

Syarahan umum Dr Sidek tarik perhatian pelajar UMS

UB 30.11.2013 8

KOTA KINABALU: Seramai 500 pelajar Universiti Malaysia Sabah (UMS) telah menghadiri syarahan umum daripada Prof Dato' Dr Sidek Baba yang berlangsung di Dewan Kuliah Pusat 1, universiti Eko-Kampus itu baru-baru ini.

Bertema 'Merealisasikan Agenda Bumi Semua Manusia Dalam Konteks Negara Malaysia', syarahan anjuran Pusat Penataran Ilmu dan Bahasa (PPIB) itu nyata cukup memukau para pelajar yang kebanyakannya mengikuti Kursus Hubungan Etnik dan Kursus Tamadun Islam dan Tamadun Asia.

Menurut Sidek, persefahaman dan toleransi perlu dalam mewujudkan kesejahteraan hidup bersama, yakni setiap individu berhak hidup dan mendapat peluang yang adil dan

dilindungi undang-undang supaya proses demokrasi benar-benar hidup untuk menjamin kesejahteraan.

"Sebuah kehidupan yang lebih baik mestilah berasaskan ilmu dan pendidikan yang bertunjangkan etika dan nilai. Dalam konteks Malaysia yang mempunyai keunikan masyarakat majmuk dan muafakat, perkongsian serta toleransi adalah penting," katanya.

Beliau berkata perbezaan dalam aliran kepercayaan dan budaya hidup tidak sepatutnya dijadikan pertentangan, sebaliknya titik-titik persamaan perlu disuburkan demi mencapai kehidupan yang sejahtera.

Turut hadir Timbalan Dekan Akademik dan Pengantarabangsaan PPIB, Dr Suraya Sintang yang mewakili Dekan PPIB.



SURAYA mewakili dekan menyampaikan cenderahati kepada Sidek Baba.